

中国文献珍本丛刊

明代经济文录三种（七）

全国图书馆文献缩微复制中心

明代经济文录三种目录（七）

皇明经济文录

卷三十六	一三九
卷三十七	一九三
卷三十八	二九九
卷三十九	四〇五
卷四十	五〇五
卷四十一	五〇五

皇明經濟文錄卷之三十六

大同

大同論

許論

大同古雲中地東至枳兒嶺西至平虜城川原平衍故多大舉之寇西則平虜威遠中則右衛水口等處初設大同府分封代王外分東中西三路北設二邊拱衛鎮城皆稱要害蓋虜南犯朔應諸城必窺之路也東則天城陽和爲虜入順聖諸處之衝北二邊俱壞虜至直抵鎮城况虜在套中而平虜西連老營堡與偏關近虜纔出套便涉其境故大同稱難守焉先年邊政嚴明警備差緩自多故以

來大邊已失二邊之內棄為王庭墩軍驕愴警報不明至有與虜通貨入而後報者他可知矣以地利言則議者曰五堡決不可不復高山聚落之戍是宜當增以人事言愚以為正紀綱明法令今第一義也夫張文錦之敗是彼處置乖方而激成之也李瑾之死則是處文錦之事未善而養成之耳今日之事愚又有隱憂矣默化潛奪不震不驚為天下回觀聽非豪傑之士忠義之臣其孰能為之吁可易言哉夫修五堡有三利焉藩屏外固內地獲安一也沃土茂田富庶可期二也二邊既復宣寧等縣棄地亦漸理三也文錦失處而致變後人懲噎而廢食可乎高山聚落

二堡蓋在鎮城兩腋間實爲東南虜衝募軍分駐則按伏之費省犄角之勢成無容議矣顧募軍之糧所宜亟補耳北虜貢路例在大同先襄毅巡撫時三年三貢各邊寧謐者數年往歲榆林欵塞說者謂似涉和議拒而不納豈典章未諳邪夫北虜稱欵難也反自疑阻然則歲歲侵暴而勞費者是當然邪河南山西歲進多不及額而屯田又多逋負是故足食之計非例外發銀專官糴買吾無策矣若夫馬之衰耗弊在各城搶兌此在軍之害當事者不可不知耳偏頭寧武鴈門三關各稱要害而偏關逼近黃河焦家坪娘娘灘羊圈子等處皆套虜渡口往來蹂躪歲無虛

日尤爲難守今防守之兵半是民壯馬又小弱非太僕寺
所兌者扶傷救死之不暇而責以敵愾之氣難哉或謂已
已之變大同徵山西之兵防禦者蓋幾七千今在鎮城止
修新水門戶之役而坐糜糧餉分毫無益若改戍三關給
以太僕寺之馬民壯數千盡爲除革此不惟邊防有賴而
所省亦且不貲矣夫魏尚李廣皆守雲中尚給士卒餉軍
吏無所不至廣遠斥堠就水草頓止人人自便是以能用
其衆以致匈奴今之邊臣有能愛將士若此者乎先襄毅
巡撫之日雖不敢擬之古人至裁占役禁掊剋恤調遣優
死傷未嘗不誠心以求之是以鎮人至今不能忘焉今平

日恩德旣無以結其心臨時節制又無以宣其威不幸有變遂因而爲姑息之政姑息必疑疑則阻威之不服而恩之不感是誠驕悍之習雖魏尚李廣豈能馭之哉由今之道馭今之兵厝火積薪因以爲安吾不知大同所終也

大同保障

魏煥

大同鎮城高拱完固內設山西行都司管轄東西二路一十五衛所鎮守總兵一副總兵一遊擊將軍二坐營官一統領本鎮并河南春秋二班輪戍官軍東西北三路各設分守叅將一員以守一路設守備都指揮一十七員以守一方北去鎮城九十里舊爲二邊又九十里爲大邊各墻

堡聯絡以限邊夷後兩邊俱壞嘉靖十八年復築弘賜鎮
川鎮邊鎮虜鎮河五堡于二邊內去鎮城五十里五堡添
設守備五員弘賜堡居中復添設分守叅將一員屯兵戍
守以漸修築則大邊可復授鎮守者當留意焉

大同邊夷

魏煥

北虜哈喇真哈連二部常在此邊往牧哈喇真部下爲營
者一火酋把答罕柰領之兵約三萬哈連部下爲營者一
火酋失喇台吉領之兵約二萬入寇無常近來套虜出套
亦同此虜入寇

大同經畧

魏煥

國初驅逐胡虜築內外二邊牆各屯軍牧可守膏腴可耕糧餉亦足後俱失守棄爲虜地嘉靖初巡撫都御史張文錦議築五堡於內邊爲耕守計誠是也委叅將賈鑑徙城中居人從事而却以威時重遷者效尤甘肅遂殺鑑鼓譟附虜文錦招徠之繫官旗于獄叛軍復殺文錦輔臣建議撫之每軍仍賞銀二兩始定議者謂撫叛則可賞叛則非此所以開後日之隙也五堡遂已由是虜寇內侵無虛歲十八年總督尚書毛伯溫議復築五堡今本邊軍民欲徙者聽人皆樂從而五堡成堡外牆塹一新虜不敢近但人稀無積糧耳苟能招徠克積使內邊固外邊以漸而成大

同無憂矣

嘉靖十年大同再變以軍驕不制效尤往昔故也調度方嚴遂殺主將總兵李瑾破獄擁衆犯黃鎮爲將招達虜犯邊朝議推桂勇爲總兵勇以計擒首惡七人捶死過半七人家衆驚入殺勇家口一十六人惟勇僅免叛軍閉城不下時計有引威寧海子水灌城者差兵部主事楚書同工部郎中從事時戶部郎中詹榮在內知叛軍有求解意密示書入書單騎入城誘把總指揮楊林馬昇擒叛首以獻時輔臣張孚敬懲往年賞叛之失議必征推卻勇總兵直抵鎮城下總制劉源清兵亦至勇不受總制計殺南郊

市民殆盡城中洶洶書遣二將官至劉邵營語昇林計取
免死牌回城昇林擒送首惡數人大兵始退城中方定朝
議遷昇于湖廣林于福建撫其衆命侍郎黃琯往按罪
狀琯劾劉邵繫獄久之後遇詔免

一鎮兵累叛不靖雖往昔釀成亦兵衆故也議者謂于五
堡東西空處各設一鎮城以城中兵分鎮鼎立則防禦備
而調度易亦一策也

一說馭叛兵須察各營強悍爲衆倡者取赴軍門施不測
之恩結爲心腹則衆叛自定此總兵馬末行之于劍州遼
東者也

一近年大同總兵無如梁震震收虜中回人口養馬家
丁者數百與之婚娶授以鞍馬器械使出境與虜同處見
虜勢弱即斬首以歸自是虜不敢近邊者數年而邊軍懾
服不敢鴛鴦此大同故事也

擒獲達賊事

于謙

鎮守大同右少監馬慶題該土山兒墩百戶蕭勝報本
年十二月十九日午時分軍人趙蘆斗瞭見境外有步行
人腰帶弓箭前來隨今夜不收呂小良等下墩潛入馬欄
牆內因見向墩射箭認是達賊其呂小良等奮勇擒獲因
帖木兒等將領人馬二百餘騎在邊哨探接取進貢使

臣因我省得漢語差來打聽聲息就便捉住等因行移知會會同總兵官定襄伯郭登巡按直隸監察御史鄭韶等計議得達賊出沒不肯轉離鞍馬今奄克帖木兒步行到墩又止一人既稱打聽進貢使臣其守墩官軍只合溫言撫按却乃掩襲拏擒非惟有失朝廷大信抑且引惹事端又恐係來降及走回人口小人邀功駕禍無辜又該總兵官定襄伯郭登等亦題前事通抄到部臣等切惟中國之馭夷狄固當振之以兵威尤當撫之以恩信所以折其強而結其心也今也先節次遣人朝貢其譎詐之謀雖未可知而和好之禮則未嘗有失今以使臣未回遣

人探聽迎接其奄克帖木兒既不騎坐鞍馬又不潛入邊城明說探接使臣別無奸細情節而守墩官軍就將本人槍拏只貪一時之近功不顧朝廷之大體而都督方善又不斟酌事情輒便輕信起解今訪得奄克帖木兒見行監問切以爲此特一佯虜而殺之不足爲武而或有以啓釁舍之不以爲怯而或有益於事如蒙聖恩乞勅法司再行研審委的止是探聽使臣消息別無其餘重情請勅令該府差人連奄克帖木兒齎送前去大同總兵官定襄伯郭登等處撫令聽候邊上如有也先差來之人就彼交與領回仍諭也先以朝廷忠厚撫待之意使知感激

本部仍行都督方善并各邊總兵鎮守等官今後各要
搠軍馬固守地方果有賊寇侵犯相機勦殺若虜中遣人
來邊打話止是一二人三五人別無奸細情由及遠探隨
後再無跟隨人馬就便撫令回還不許貪圖小利邀功生
事以啓邊釁以貽後患亦不許指此爲由縱賊入境剽掠
以誤邊務景泰二年正月初三日題奉 聖旨是欽此

大同停徵稅糧疏

臣因大同地方民貧歲歉具奏蠲免停徵稅糧近奉戶
部行臣文劄似以臣言爲妄臣觀本部所議有曰正德十
六年大同有災州縣徧所已照分數除豁無災稅糧不知

緣何停徵者臣惟大同近年飢荒小民貧苦去冬今春斗米幾值三錢事勢之極言之不殫至於先年奏報災傷欠真乃是有司不恤民隱之罪豈可以此遂以爲大同有無災之地有不饑之民哉本部所議又有曰大同一鎮本部給發甚多者夫大同所發該部錢糧乃是供給軍馬調度之用固未聞該部發幾萬兩濟某縣之饑又曾發幾萬兩寬某州之稅也今乃以此而塞臣之請是猶以東家之負欠而奪西隣之契券也本部所議又有曰本鎮歲徵不足歲用天地所生財貨百物不在官則在民收貯在官者堪以接濟則拖欠在民者乃可寬徵臣愚不能遠舉古昔且